

«MOTTAKERNAVN»
«ADRESSE»
«POSTNR» «POSTSTED»

Trondheim, 04.04.2017

Dykkar ref.:
[Dykkar ref.]

Vår ref. (bes oppgitt ved svar):
2017/1832

Sakshandsamar:
Geir Rune Rauset

Skadefelling av jerv i delar av Ballangen kommune, region 7, 2017

Miljødirektoratet set etter eige tiltak i verk skadefelling av inntil 1 jerv i delar av Ballangen kommune, region 7, jf. lov 19. juni 2009 nr. 100 om forvaltning av naturens mangfold (naturmangfoldloven) § 18 fyrste ledd b) og § 77, jf. forskrift 18. mars 2005 nr. 242 om forvaltning av rovvilt (rovviltforskriften) § 13 jf. §§ 1 og 3. Miljødirektoratet v/Statens naturoppsyn (SNO) er ansvarleg for gjennomføring av fellingsforsøka. Skadefelling vert gjennomført for å hindre skade på husdyr og tamrein.

Vi viser til Miljødirektoratet sine vurderingar og bakgrunnsinformasjon for vedtaket i vedlegget "Grunnlag for skadefelling av jerv i Noreg 2017" og brev frå Rovviltneemnda i region 7 av 20. mars 2017 om prioriteringar for uttak av jerv.

Bestand og overvaking

Vi legg til grunn nasjonal status for bestandssituasjonen i vedlegg "Grunnlag for skadefelling av jerv i Noreg 2017".

I rovviltregion 7 er det fastsett eit bestandsmål på 10 årlege ynglingar av jerv. Året 2016 vart det observert 10 ynglingar av jerv i region 7, og i begge dei to føregåande åra 13 ynglingar (NINA rapport 1291).

Av dei 10 ynglingane i 2016 vart det gjennomført 4 ekstraordinære uttak av familiegrupper i Nordland (i Beiarn, Rana, Hemnes og Vefsn), i tillegg til 4 skadefellingar av enkeltindivider, slik at netto tal før beitesesongen 2016 var 6 kjente ynglingar. Etter ekstrauttak har gjennomsnittleg tal på jerveynglingar siste tre år vore 9,3.

Så langt i denne overvakingssesongen har det ikkje blitt registrert dokumenterte eller antatt dokumenterte jerveynglingar i region 7.

I løpet av lisensfellingsperioden for jerv i 2016-2017 vart det til saman felt 12 jervar i region 7, og ein av desse vart felt i det aktuelle området. Miljødirektoratet har i tillegg teke ut 4 jervar på

skadefelling etter eige tiltak i region 7 for å hindre skade på tamrein og sau.

Skadesituasjon og erstatning for rovviltskader

Fylkesmannen i Nordland utbetalte erstatning for 311 sau og 2147 lam som tap til rovvilt i 2016, og 42% av dette vert erstatta som tap til jerv.. I reindriftsåret 2015/2016 vart det utbetalt erstatning for 3079 tamrein som tap til rovvilt i Nordland og 36% av dette vart erstatta som tap til jerv.

I det aktuelle området for uttak av jerv har det vore dokumentert eit aukande tal jerveskadar dei siste åra. I 2015 vart det dokumentert 8 sau og 1 rein drepne av jerv og i 2016 vart det dokumentert 20 sau. Skadepotensialet på sau og lam vert difor vurdert som stort. I tillegg er det kalvingsland for tamrein i det aktuelle området.

Fylkesmannen i Nordland var hausten 2016 i dialogmøte med beitebrukarar i området, og har vidareformidla oppmoding om skadefelling av jerv til Miljødirektoratet. Rovviltnemnda i region 7 retta og i brev til Miljødirektoratet av 20. mars 2017 ynskje om at Håfjellhalvøya skulle prioriterast for uttak av jerv.

Miljødirektoratet sine vurderingar

Direktoratet konstaterer at lisensfelling ikkje har vore tilstrekkeleg for å regulere bestanden av jerv og dermed redusere skadepotensiale overfor beitenæringane i enkelte område av region 7. Skadehistorikk og skadepotensiale for sau og tamrein er gjeve avgjerande vekt i vurderinga. Bestandssituasjonen for jerv, nemnda si prioritering av aktuelle område for uttak og geografisk differensiering nedfelt i forvaltningsplan er andre moment som direktoratet har vektlagt i si vurdering. Vi legg til grunn nasjonal status og lovgrunnlaget i vedlegg "Grunnlag for skadefelling av jerv i Noreg 2017".

Direktoratet vurderer at det ikkje ligg føre noko anna tilfredsstillande løysing i det aktuelle området enn ekstraordinært uttak av jerv vinteren/våren 2017. Eit slikt uttak vert vurdert til ikkje å vere til skade for jervebestanden si overleving, eller å kome i konflikt med det nasjonale bestandsmålet for jerv, jf. Innst. S. nr. 174 (2003-2004) og rovviltforskriften §§ 3 og 4.

Konklusjon

Ut frå vurderingane ovanfor og med heimel i lov 19. juni 2009 nr. 100 om forvaltning av naturens mangfold (naturmangfoldloven) § 18 fyrste ledd b) og § 77, jf. forskrift 18. mars 2005 nr. 242 om forvaltning av rovvilt (rovviltforskriften) § 13, jf. §§ 1 og 3, set direktoratet av eige tiltak i verk felling av inntil 1 jerv innanfor nærare avgrensa område i Nordland fylke. Forsøk på felling skal primært rettast mot område med konsentrerte jerveskader på sau og/eller tamrein innanfor de nærare gjevne kommunar.

Følgjande vilkår er knytt til iverksetjing av felling:

1. Totalt kan det fellast opp til 1 jerv på Håfjellhalvøya i Ballangen Kommune, avgrensa i sør og aust av E6.
2. Miljødirektoratet v/Statens naturoppsyn er ansvarleg for gjennomføring av fellingsforsøket. Fellingsforsøket vert gjennomført i tråd med fastsett "Instruks for det statlige fellingslaget ved uttak av vilt".
3. Dersom yngling blir påvist i området der forsøk på felling av enkeltdyr er i gang, skal direktoratet varslast og gjere ei vurdering om løyve til felling av enkeltdyr skal endrast til uttak og avliving av årsunge (/ar) og mordyr frå ynglehi.
4. Vedtaket gjeld i tidsrommet 1. - 3. april 2017.
5. Miljødirektoratet kan til ein kvar tid trekkje tilbake løyve til felling.

Et slikt uttak av eige tiltak er ikkje eit enkeltvedtak, og forvaltningsloven sine klagereglar kjem ikkje til bruk, jf. naturmangfoldloven § 18 tredje ledd.

Dette brevet vert sendt til rovviltnemnda i region 7, Fylkesmannen i Nordland, Ballangen kommune og Salten politidistrikt, Klima- og miljødepartementet, Landbruks- og matdepartementet og Mattilsynet.

Helsing
Miljødirektoratet

Dette dokumentet er elektronisk godkjend

Susanne Hansen
fung. seksjonsleiar

Geir Rune Rauset
rådgjevar

Tenk miljø - velg digital postkasse frå e-Boks eller Digipost på www.norge.no.

Vedlegg 1: Grunnlag for skadefelling av jerv i Noreg våren 2017